

詞

綜

補

遺

詞綜補遺卷五

長洲 陶 樛 緝

宋詞七十七首

陳三聘

六十五首

陳 偕

三首

謝明遠

二首

聞人武子

一首

郭世模

五首

郭 章

一首

陳三聘

字夢敬東吳人有
和石湖詞一卷

夢敬自序大參相公望重百僚名滿四海有志之士願見而不可得者也一日容懷詩詞數十篇相示曰此大參范公近作也客既去披吟累日輒以蕪言屬韻可笑其不自量矣然使三聘獲登龍門賓客之後塵與聞黃鐘大呂之重平時之願至足於此則今日狂率

之意無乃自爲他時之地哉至於良玉砥礪
雜然前陳茲固不免於罪戾尙可追耶
按宋史范成大紹興間擢進士第自戶曹遷
正字其後以四川制置使召對拜參知政事
出知明州以病請閒進資政殿學士澄懷錄
稱石湖歸吳在淳熙六年己亥觀詞中丙午
立春朝中措一闕則石湖家居已闕七年伯
攷當爲孝宗時人借仕履無考

滿江紅

雨後攜家游西湖荷花盛開

紺縠浮空山擁髻晚來風急吹驟雨藕花千柄豔妝新
浥窺鑑粉光猶有淚凌波羅襪何曾濕訝漢宮朝罷玉
皇歸凝倩立樽前恨歌三疊身外事輕飛葉悵當年
空擊誓江孤楫雲色遠連平野盡夕陽偏傍疎林入看
月明冷浸碧琉璃君須吸

又

斜日鎔金三萬頃，棹歌齊舉風不動。采蘋雙漿翠鬢相，
語月殿欲浮蟾兔魄。海神不放魚龍舞，到今宵秋氣十
分清無今古。君試喚扁舟侶來，伴我瀟湘渚共夷猶。
春浪笑歌秋浦，霸越獨高身退後，塵纓未濯人誰許。歎
酒杯不到子陵臺，劉伶土

千秋歲

重到桃花塢

當年漁隱路，轉桃溪，匯流水。下青山外，客行花徑，曲月
上松門，對撐艇子雪中簑笠，親曾載。老去誰傾蓋腰。
瘦頻移帶人健否，花仍在。明年春更好，來向花前醉青

鬢改恁時難拚千金買

浣溪紗 燭下海棠

酒力先從臉暈生粉粧新麗笑相迎曉寒高護彩雲輕
不語似愁春力淺有情應恨燭花明更於何處覓傾

城

又

翠幕遮籠錦一叢樽前初見淺深紅淡雲和月影蔥蘢
醉態只疑春睡裏啼粧愁聽雨聲中更燒銀燭醉東
風

又 新安驛席上留別

不怕春寒更出游
蘭橈飛動却驚鷗
烟光佳處輒遲留
屏曲未曾歌
醉夢眉尖空只鎖
閒愁從教絲柳絆行舟

又

越浦朝來信息通
吳山不見暮雲重
人生何事各西東
烟外好花紅
淺淡雨餘芳草綠
蔥蘢苦無歡意敵春風

又 元夕後三日王文明席上

點檢尊前花柳叢
於中偏占牡丹風
等閒言語慣迎逢
扇影不搖珠的皦
釵梁斜擲玉玲瓏
夢魂長向楚江

東

又

簾壓低垂月影疎梅枝和雪玉相扶兒家春信入來無
半墜寶釵慵覽鏡任偏羅髻却拈書琴心誰與問相
如

朝中措

丙午立春大雪是歲十二月九日丑時立春

朝來和氣滿西山拄頰小闌干柳色野塘幽興梅花紙
帳輕寒 三盃淡酒玉腴蔬嫩青縷堆盤細寫池塘詩

夢玉人翦做春旛

按丙午爲孝宗淳熙十三年是年閏七月於十二月九日立春律歷志載

布衣皇甫明以九月望當在十七日太史乃注於十六
日下次年國學進士石簡亦言清明夏至處暑立秋四

氣及正月望十月朔二月十二月下弦六月八月上弦
並差一日當時厯法疎略卽置閏一事亦有差誤不盡
如皇甫諸人所糾也

又

求田何處是生涯雙鬢已先華隨分夏涼冬暖賞心秋
月春花 吾年如此愁來問酒困後呼茶結社竹林詩
老卜鄰江上漁家

又

去年曾醉杏花坊柳色間輕黃重覓舊時行迹春風滿
路梅香 平沙岸草夫差故國知是吾鄉夢斷數聲柔
櫓只應已過橫塘

又

草堂春過一分餘
幽事酒醒初
琴調細鳴焦木
矢聲不
斷銅壺
關心藥裹忘年
簑笠自著潛夫
雨後長鏡東
麓月明短艇西湖

又

秋山橫截半湖光
湖渚橘枝黃
紈扇羅搖蟬影
練衣已
怯風涼
插紅裂鱗銀絲
膾鮑莫負傳觴
醉裏乾坤廣
大人間寵辱兼忘

蝶戀花

閭闔城西山四面
鴨綠鱗鱗輕拍橫塘岸
一陣東風羊

角轉望中已覺孤帆遠 獨恨尋芳來較晚
柘老桑柔農務邨村遍
山鳥勸沽官酒賤
炊烟深巷聽操繭

南柯子

別後驚人遠 歸心怯櫓柔
晚天涼思冷於秋
冷浸一溪明月水
瀾流 醉裏狂仍在
吟餘趣極幽
夜深何用數更籌
別有好風吹酒不須求

又

烟樹觀前浦 風蘋聽遠洲
等閒來上水邊樓
悵望天涯何處有歸舟
香斷燈花夜歌停
扇影秋欲緘
尺素說離愁
不見雙魚空有大江流

又

月傍雲頭吐風將雨脚吹夜深烏鵲向南飛應是星娥
顰恨入雙眉 舊怨垂千古新歡只片時一年屈指數
佳期到得佳期別了又相思

水調歌頭

玉鑑十分滿清露一年秋漂流蹤跡誰念楚尾與吳頭
此夜刮明塵眼望極好張詩膽何處有高樓浩蕩銀潢
冷縹緲白雲浮 笑勞生難坎止亦乘流闌干拍碎清
夜起舞不勝愁萬里關河依舊一寸功名烏有清淚滴
衣裘老去心空在歸夢繞蘋洲

西江月

詩眼曾逢花面畫圖還識春嬌當年風格太妖饒粉膩
酥柔更好酒暈不溫香臉玉慵猶怯輕綃春風別後
又秋高再見只應人老

又

春事已濃多日游人偏盛今年梨花寒食雨餘天鴨綠
含風浪淺翠袖半黏飛粉羅衣尙怯輕寒不辭歸路
委香鈿門外東風如箭

鵲橋仙

七夕

銀潢仙仗離多會少朝暮世情休妬夜深風露灑然秋

又莫是輕分淚雨 雲收霧散漏殘更盡遙想雙星情
緒憑誰批敕訴天公待留住今宵休去

宜男草

搖落丹楓素秋後舞長亭尙餘衰柳別夢回憶得雙柑
分我應自有濃香喚手 宿醒誰解三盃酒曉山橫望
中街斗人去也縱得相逢似舊問當日紅顏在否

又

綠水黏天淨無浪轉東風穀紋微漲箇中趣莫遣人知
容我日日扁舟獨往 平生書癖已無恙解名韉更逃
羈網春近也梅柳頻看枝上玉蕊金絲暗長

秦樓月

雲衣薄春晴自有東風掠東風掠試聽枝上幾聲乾鵲
曲屏心事新題却離愁何用堆眉角堆眉角今朝莫
是打頭風惡

又

花前狹翠茵圍坐花陰合花陰合閒情不似一雙狂蝶
春溝何處尋紅葉春寒料想羅衣怯羅衣怯午醺醒
未翠衾重疊

又

光風薄楊花欲謝春應覺春應覺一庭紅杏粉花吹落

台遊無復飛紅索憑高獨上湖邊閣湖邊閣黃昏獨
倚畫闌西角

又

青樓缺樓心人待黃昏月黃昏月入簾無奈柳綿吹雪
誰人弄笛聲嗚咽傷春半解丁香結丁香結鱗鴻何
處路遙江闊

又

春膏集新雷忽起龍蛇蟄龍蛇蟄柳塘風快水流聲急
傷心有淚憑誰泥尊前容易青衫濕青衫濕渡頭人
去野船鷗立

念奴嬌

晴風麗日算東君扶遍梅心桃萼獨有名花開殿後一
笑嫣然如昨黃袂層膚霞冠高擁多態春才覺雨中風
帽故人來趁花約好似羅綺添春香風環坐半醉金
釵落老去心情難似舊手撚花枝爲樂麝馥縈妝愁花
凝恨一作麝馥縈莫惜金荷酌酒闌花睡夢魂重到京
洛

又

浮雲吹盡捲長空千頃都疑寒碧兔杵無聲風露冷天
也應憐人寂故遣姮娥駕蟾飛上玉宇元同色天津何

事此時偏界南北 不但對影三人我歌君和我舞君
須拍滌洗胸中愁萬斛莫問今宵何夕老矣休論著鞭
安用一笑真狂客夜深歸去爛然溪上阡陌

又

水空高下望沈沈一色渾然蒼碧天籟不鳴涼有露金
氣橫秋寂寂玉宇瓊樓望中何處月到天中極御風歸
去不愁衣袂無力 此夜飄泊孤篷短歌誰和自笑狂
蹤跡咫尺藍橋仙路遠窅窅雲英消息疎影婆娑恍然
身世我是樽前客一聲淒怨倚樓誰弄長笛

又

餘霞飛綺望長天頃刻雲容凝碧今夕江皋風力軟明日波心頭白客舸東流語離深夜遣我新愁積春融花麗定知天相行色別後一紙鄉書故人相問好趁秋鴻翼空有佳人千點淚錦字機中曾織利鎖名韁古今同是誰失知誰得來朝愁望舊樓何處西北

又 和徐尉游石湖

扁舟此計問當年誰與尋盟鷗鳥許國勲名彛鼎在風月不妨吟笑碧草臺邊紅雲溪上壽杖扶詩老水浮天處未應俗駕曾到盛事埒美知章鑑湖君賜宸翰今題號指點飛烟輕靄外有路直通仙島簑笠漁船琴書

客坐清夜樽罍倒未須歸去片蟾飛上林表

惜分飛

莫唱驪駒容首聚花徑重來微步從此朝天去故山怨
鶴棲猿侶 試卜西園春在否無奈濛濛細雨明日長
亭路斷魂芳艸人何處

夢玉人引

別來何處酒醒後夢難覓晚日溪亭清曉便挂帆席滿
載離愁指去程還作江南行客目斷層城數迢迢山驛
素中空染淚痕斑應是暗中滴記得輕分玉簫猶自
凄咽昨夜東風梅柳驚春色料伊也沒心情過却好天

良夕

又

倚闌干久人不見暮雲碧芳草池塘春夢暗驚詩客昨夜溪梅向空山雪裏輕勻顏色好贈行人折枝南枝北
雨中風帽昔追游誰念舊蹤跡料得疎籬暗香時度
風息淡月微雲有何人消得便歸去踏溪橋慰我經年
思憶

菩薩蠻

筇枝探得梅開了青鞋漸踏江頭草日日作東風海棠
相次紅離多良會少此計應須早莫待作行人却將

愁送春

又

楊花滿院飛紅索春光不似人情薄樓閣斷霞明梨花
開晚晴 玉虬香散後扶困三杯酒不是聽思歸歸心
思此時

如夢令

紅紫不將春住風定更飄無數溪漲綠含風短艇晚橫
沙渡歸去歸去肯念西池鴛鴦

臨江仙

夜飲只愁更漏促留連笑罨薔薇歌聲繚繞徹簾幃坐

中清淚落梁上暗塵飛
重覩舞腰驚束素不應更褪
羅衣別來容易見來稀
次公狂已甚不醉亦忘歸

又

白首故人重會面論交爾汝忘形從今心跡喜雙清飛
鴻追往事夢蝶笑餘生
琥珀杯濃春正好此懷端爲
君傾舊時猿鶴敢寒盟
鳩居從拙計鵬翼任高程

減字木蘭花

凝雲不動玉海無聲
千丈凍來倚闌干襟袖憑虛徹骨
寒
歸心易折後夜月明應恨別
罨畫圖邊著我披蓑

上釣船

又

東籬黃菊細撚香枝人事熟少緩芳尊且醉農家麩米
春 老人齋戒底事秋來移角帶歸夢相關明月松江
萬頃寬

又

先生困熟萬卷詩中聊托宿似怯清寒更蒸都梁向博
山 游仙夢杳啼鳥聲中春又曉未著烏紗獨坐溪亭
數落花

又

殷勤舉白昨夜東風猶有雪莫恨春遲曾見梅花第一

枝 陰晴未決早晚清明新火活夢繞秦樓欲趁歸潮
上客舟

又

盈盈裊裊欲問卿卿還好好無奈嬌何摺摺湘褰薄薄
羅 尊前歌曲舞作迴風花拍促壓盡時流棊裏輸伊
一百籌

鷓鴣天

酒暈從教上臉丹春愁何事點眉山都將別後深深意
且向尊前細細看 多少恨說應難粉巾空染淚爛斑
爐狻爭雁長閒却明月樓心夜正寒

又

指剝春蔥去採蘋衣絲秋藕不沾塵
眼波明處偏宜笑
眉黛愁來也解顰
巫峽路憶行雲幾番會
夢曲江春
相逢細把銀釭照
猶恐今宵夢似真

又

昨夜東風怨不成
曉來猶自掃殘英
半酸梅子連枝重
無力楊花到地輕
情易感涕先零
玉虬香冷更凄清
事如芳草綿綿遠
恨比浮雲冉冉生

又
雪梅

剪碎霜綃巧作團
玉纖特地被朝寒
疎花好向釵橫見

瘦影難敲月墮看 將舊恨入眉彎不須多樣縷金旂
當時千點東風淚怪見妝成粉未乾

好事近

枝上幾多春數點不融香雪縱有筆頭千字也難誇清
絕 艷桃穠李敢爭妍清怨笛中咽試築短筇溪上看
影浮波月

卜算子

雪後竹枝風醉夢風吹醒瘦立寒堦滿地春澹月梅花
影 門外蘼蘼寒曉汲喧金井長笛何人更倚樓玉指
風前冷

又

澗下水聲寒壑底松風靜時有清香度竹來步月尋疎影
往事屬東風試問花應省曾是花前把酒人別夢
溪堂冷

三登樂

注望曉山晴色麗晨餐應飽穀紋平漲天渺渺倚藤杖
撐艇子昔游曾到江山自古水雲轉好 悵年來心縱
在盟寒鷗鳥故人中黑頭漸少問幾時尋舊約石磯重
掃一竿釣月髯霜任老

又

南北相逢重借問古今齊楚燭花紅夜闌共語悵六朝
興廢但倚空高樹目斷帝鄉夢迷雁浦故人疎梅驛
斷音書有數塞鴻歸過來又去正春濃依舊作天涯行
旅傷心望極淡烟細雨

浪淘沙

風雨晚春天芳興慵慳淺紅稠綠滿園間獨有梨花三
四朶留住春寒年少躍金鞍咫尺關山倦飛如我已
知還灑向東風千點淚衣上重看

虞美人

寄人覓梅

融融睡覺東風息行到溪亭側一枝梅玉似人人索笑

依然消瘦不禁春
相逢試問情多少
應怪山翁老翠
蘿高護結花隣
一任餘芳爭學捧心顰

又

飛瓊曉壓梅枝重
酒面羊羔凍
誰將縞帶逐車翻
明月秦樓昨夜不勝寒
何須捲起重簾幙
恐怕春羅薄玉
杯特勸醉厭厭
無奈有人籠袖出香尖

又

天公意向人情滿
燈月人同看
中秋雖是十分明
不比今宵處處有華燈
豔桃穠李歌闌後
更醉青樓酒不
妨飲盡玉東西
橫笛聲中春色要君知

又紅木犀

乾紅剪碎煩織玉相並黃金粟漢宮素面說明妃馬上
秋風應解著麝支 黃昏小樹堪愁絕不比梅花月滿
天風露透肌涼插取雙枝歸去是誰香

浣溪紗

不躍銀鞍與繡鞵曲筇芒屨見衰年尋幽來立渡頭船
碧澗芹羹珍下筯紅蓮香飯樂歸田不妨樽酒興悠
然

如夢令

珍重故人相許來向水亭幽處文字閒金釵消盡晚天

微暑無雨無雨不比尋常端午

菩薩蠻

春城辦得紅蕖了紅蕖未點春先到新月入新年方纔
今夜圓雲屏誰爲隔腸斷金釵客好語寫春旂都教
席上看

好事近

我欲御天風飛上廣寒宮闕撼動一輪秋桂照人閒愁
絕歸來須著酒消磨玉面點紅纈起舞爲君狂醉更
何須邀月

陳

偕字月境

秦觀淮海集陳偕淮南廣陵人

入聲甘州

見陽春白雪

芰荷風滌面恰麥秋應倒著春衣渡曉溪雲濕日流塵
腳露洗蛛絲調翼受風雛燕弱不解爭泥襯琅玕錦院
竹外薔薇立久闌干凭煖看行魚吹沫波暈平池蘚
痕斑礎石漸雨熟梅時傍短籬成團粉蝶掠野花相逐
口高低忘言處繳絃乍拂流水先知

滿庭芳

西湖

嵐影浮春雲容閣雨澄泓碧展玻璃高低樓觀窻戶舞
漣漪別有輕盈水面清謳起舟葉如飛沙堤上垂鞭信

馬柳重綠交枝 漸殘紅倒影金波
激激絃管催歸看
飄香陳粉滿路扶攜不盡湖邊風月孤山下
猿鳥先知
東風裡年年此水貯盡是和非

又 送春

榆莢拋錢桃英胎子楊花已送春歸未成萍葉水面綠
紋肥沙暖溪禽行哺忘機處雛母相隨重簾靜銅盃盡
歇聲度竹間碁 人生如意少樂隨春減恨爲情離怕
牽愁勾怨漸近金徽浮世更相代謝江頭明月渡口斜
暉關情處摩挲釣石莫遣上苔衣

謝明遠

鄧肅拚欄集次韵謝明遠和云乞身上爲
溪山征鼓不容袞笠閒酷暑扁舟同海角暖
風杯酒念長安高情我自歸蓮社妙譽君應
冠杏壇更約三山少從款頰虬吐卵槃金盤
菩薩蠻

見陽春白雲

春風春雨花經眼石泉槐火春容晚流水自無情回波
聚落英 問春何處去春向天邊住舉酒欲銷愁酒闌
愁更愁

踏莎行

楚樹芊綿江雲蕪漫曉風吹墮梅千片驚禽飛去響春
空平沙月落光零亂 人意傷離物華驚換武夷此去
如天遠臨分爲我少留連柳條猶在江南岸

言系和道卷三

十一

聞人武子

紹興間人張綱有聞人武子改官制

孫紹遠聲畫集載聞人武子墨梅詩云隴首人歸信息稀愁看冰楮破寒枝瑤姬駐立緣何事直到霜飛月墮時

菩薩蠻

見陽春白雪

晴風吹暖枝頭雪露華香沁庭中月屏上小江南雨昏

天際帆 翠釵香霧濕側鬢雲鬆立燈背欲眠時曉鶯

還又啼

郭世模

字從範

陳起前賢小集拾遺錄郭從範世模長歌行短歌行烏夜啼古體三首

張仲宗蘆川歸來集有郭從範示及張安國諸公酬唱次韻詩

念奴嬌

見陽春白雪

光風轉蕙泛崇蘭漠漠滿城飛絮金谷樓危山共遠幾
點亭亭烟樹枝上殘花胭脂滿地亂落如紅雨青春將
暮玉簫聲在何處無端天與娉婷簾鉤鸚鵡夢斷聞
殘語玉骨瘦來無一把手挹羅衣看取江北江南靈均
去後誰采蘋花與香銷雲散斷魂分付潮去

浣溪紗

幾點胭脂印指紅一雙蛾綠歛眉濃夜寒綃帳燭花融
賸炷龍涎熏骨冷旋調銀液鎮心忪整鬟羞顧半嬌

慵

瑞鶴仙

雲堦連月地記舊游身在溫柔鄉裏花陰透窻綺羅衾
擁殘夢流鶯驚起銀瓶水沸待梳粧屏風共倚看情肩
恨眼宿粉剩香亂愁無際長記多情消滅宋玉連墻
茂陵同里離懷似水天涯路歎愁悴想鴛機織錦鸞臺
窺鏡秦絲幽怨未已好歸去共把琴書倚嬌扶醉

朝中措

青燈聽雨夜荒涼歸夢苦難長坐想玉奩鴛錦空餘臂
粉衣香枕邊共語窻前執手簾外啼粧也是平生薄
倖須還个度思量

南歌子

玉璫浮瓊蟻金奩吐翠虬醉鄉歸路接溫柔暗卜幽期
低約笑藏闌索去眉先鎖將言淚已流小窻移火更
遲留自剔燈花油澆玉搔頭

郭章

字仲達崑山人少入太學以守城恩拜官至通直郎

中吳紀聞郭仲達自幼工於文游京太學有聲因歸鄉省親作詩別同舍云菽水年來屬未涯羞騎款段出京華漲塵回旋風頭緊綺照支離日脚斜掠過短莎驚脫兔踏翻紅葉鬧歸鴉不堪回首孤雲外望斷淮山始是家俄又賦一篇云也知隨俗調歸策却憶當年重出關豈是長居戶限上可能無意馬蹄間中原百廢知誰運今日分陰敢自閑倘有寸功裨社稷歸來恰好賦衣斑

點絳脣

天聖宮

見山西通志

翠柏丹崖碧雲深鎖神仙府勢盤龍虎樓觀雄中土
我欲停時又恐斜陽暮黃塵路客懷良苦滿目西山雨

詞綜補遺卷五

詞綜補遺卷六

長洲 陶 樛 緝

宋詞六十八首

楊冠卿 二十四首

李 呂 十五首

趙礪老 三首

晁公武 一首

韓彥古 一首

耿時舉 一首

朱耆壽 一首

張才翁 一首

邱 密 八首

張良臣 一首

許及之 一首

徐似道 二首

王 炎 五首

張履信 二首

楊冠卿

字夢錫江陵人有客亭類藁十五卷

姜夔題楊冠卿客亭類藁楊侯筆力天下奇
早歲豪彥相追隨一班畧見客亭藁文采炳
蔚驚羣兒長安城中擇幽棲靜退不願時人
知大書前榮號霧隱意與風虎雲龍期人皆
炫耀身陸離見草而悅忘臯比南山十日不
下食君子一變誰能窺正論不作世道微通
都大邑多狐狸惜君爪牙不得施公超五里
亦奚爲

四庫全書總目按書錄解題惟載類藁卷帙
不詳冠卿出處今就藁中詩文考之紀夢詩
序云戊戌年四十戊戌爲淳熙五年上推四
十年則當生於紹興八年己未其與傅漕詩
有鄉書憶昔獻賢能姓氏曾叨天府登句則
嘗舉進士上執政啟云奉命領州奪符而歸
又有祭廣東主管衙土地文則嘗出知廣州
以事罷職又姜夔贈詩云云意解官後又僑
寓臨安也

如夢令

滿院落花春寂風絮一簾斜日翠鈿曉寒輕獨倚秋千
無力無力無力感破遠山愁碧

生查子

聞鶯用竹坡韻

嬌鶯恰恰啼過水翻回去欲共訴芳心故繞池邊樹
人去綺窗閒絃斷秦箏柱百轉聽新聲總是傷情處

又

忠甫持梅水仙研箋索詞

消瘦不勝寒獨立江南路羅韞暗生塵不見凌波步
蘭珮解明璫往事憑誰訴一紙綠雲箋好寄青鸞去

又

賦湘妃鼓瑟牋湘妃泛蓮葉上有片雲擎月

瀟湘日暮時倚櫂蒹葭浦不見獨醒人愁對湘如語
璧月送歸雲一葉蓮舟舉瑤瑟奏清商波底魚龍舞

浣溪沙

次韓戶傳

銀葉香銷暑簟清枕鴛醉倚玉釵橫起來紅日半窗明
多病情懷無可耐惜花天氣惱徐醒瑤琴誰弄曉鶯
聲

垂絲釣

翠簾畫捲庭花日影初轉酒力未醒眉黛斂還傳歌扇
背畫闌倚遍情無恨悵韶華又晚錦鞦去後愁寬珠
袖金釧碧雲信遠難託西樓雁空寫銀箏怨腸欲斷更

落紅萬點

菩薩蠻

春日呈安國舍人

飛雲障碧江天暮
杏花簾幙黃昏雨
翠袖怯春寒
有人愁倚闌
天涯芳草路
目送征鴻去
人遠玉關長
尺書難寄將

又

春日西湖用吳監簿韻

春山愁對修眉綠
春衫誰爲裁冰穀
日暮倚闌干
不禁烟霧寒
湖邊歸去路
猶記傳觴處
往事等空花
客心驚歲華

又

冰肌玉襯香綃薄無言獨倚闌干角相見又還休可堪
歸去愁 碧波溪上路幾陣黃昏雨歸去斷人腸紗厨
枕簟涼

又 雪中呈李常門

玉妃夜讌瑤池冷翩然飛下霓裳影天澗水雲長風飄
舞袖香 姑山人似舊清壓紅梅瘦同凭玉闌干光搖
銀海寒

好事近 代人書扇

晚起倦粧梳斜鞞翠鬟雲髻手撚花枝一笑問青鸞音
信 繡簾慵卷玉鈎垂風篁奏餘韻燈火黃昏院落報

離鞍人近

又

細雨落簷花
簾捲金泥紅
濕樓外遠山橫
翠染修眉愁碧
舊遊春夢了
無痕香塵暗
瑤瑟憑仗青鸞飛去問
新來消息

謁金門

春暮有感

傷漂泊負了花前期
約寒食清明都過却
愁懷無處着
晴日柳陰池閣
風絮斜穿簾幙
簾外秋千閒彩索
斷腸人寂寞

憶秦娥

雪中擁琴對梅花寓言

東風惡雪花亂舞穿簾幙穿簾幙寒侵綠綺音斷絃索
宮梅已破香紅萼梅妝想稱伊梳掠伊梳掠十分全
似舊時京洛

又

雲垂幙江天雪似楊花落楊花落翠衿不暖晚寒偏覺
起來獨倚西樓角客懷無奈傷離索傷離索蠻箋欲
寄塞鴻難托

清平樂

翠團嘉樹杜宇呼春去簾捲金泥凝望處幾點紅薇香
雨等閒過了花時殷勤來問酴醿恰有一枝春在畫

樓紅日林西

柳梢青

爲丁明仲紀夢

歸夢迢迢分明會見舞遍雲韶解道相思愁寬金釧瘦
損宮腰 覺來情緒無聊正戍角聲翻麗譙楚塞山長
巫陽人遠斗帳香銷

東坡引

歲癸丑季秋二十六日夜夢至一亭子勝
日朝雲見二少年公子云久誦公樂章頗

得從容笑話因舉似離筵舊作稱贊久之余
謝不能公子拂然不樂命小吏呼妹麗十數
輩至圍一方臺而立相與群唱聲甚淒楚俄
頃歌者取金花青牋所書詞展于臺上熟視
字畫乃余作也讀未竟一歌者從旁攬取詞
置袖中舉酒相勞苦云釵分金半股之句朝
夕誦之胡爲余不及此乎公子云左驗如此
奚事多遜抵掌一笑而寤恍然不曉所謂戲

用其語綴東坡引歌之

淥波芳草路別離記南浦香雲剪贈青絲縷釵分金半
股釵分金半股陽關一曲聲淒楚惹起離筵愁緒夢
魂擬逐征鴻去行雲無定據據行雲無定據

鷓鴣天

次韻寶溪探梅未放

歲月如馳鳥兔飛情懷著酒強支持經年不見宮粧面
醜碧誰斟翡翠卮江路晚夕陽低奚奴空負錦囊歸
欲憑驛使傳芳訊未放東風第一枝

小重山

一笑回眸百媚生嬌羞佯不語豔波橫緩移蓮步繞堦

行疑情久幽怨托銀箏 些事那回曾水精雙枕冷簟
紋平窺人燕子太無情驚夢斷何處覓行雲

蝶戀花

次張俊臣韻

舞處會看花滿面獨倚東風往事相量遍綠怨紅愁春
不啻天涯芳草人腸斷 一紙雲牋魚雁遠歸鳳求凰
誰識琴心怨臂枕香銷眉黛斂也應爲我寬金釧

水調歌頭

春日舟行

春漲一篙綠江濶暮濤寒龍驤萬斛飛舉鯨飲酒杯寬
醉倚柁樓清嘯目送孤鴻杳靄景意與俱閒恍若御風
去蓬島舊家山 記吾廬環翠竹拱蒼官碧雲信杳誰

爲日日報平安桂棹桃溪歸後流水落紅香寂春事想
闌珊賴有錦囊句寫向此中看

又 次吳斗南登雲海寺

年少青雲客懷抱百憂寬北窗醉卧春曉歸夢趁吳帆
來訪鴟夷仙跡極目平湖烟浪萬象一毫端雲海渺空
濶咫尺是蓬山 珮飛霞囊古錦幾凭闌赤城應有居
士鳳舉更龍蟠待向玉霄東望相與神遊八極身未似
雲閒長劍倚天外功業鏡頻看

又 歸自羅浮舟過于湖哭張安國至采石弔李謫
仙悼今昔二賢豪之不復見也月夜酌酒江濱
慨然而去作長短句

曳杖羅浮去遼鶴正南翔青鸞爲報消息岩壑久相望
無奈漁溪欸乃喚起蘋洲昨夢風雨趁歸航萬里家何
許天濶水雲長 歷五湖轉湘楚下三江興亡千古餘
恨收拾付詩囊重到燃犀磯渚不見騎鯨仙子客意轉
淒涼舉酒酌江月襟袖淚淋浪

李

呂

字濱老一字東老邵武軍光澤人有澹軒集七卷詞一卷

周必太平園續彙載呂墓誌云端莊自重記
誦過人年四十卽棄科舉至七十七而卒又
云學務躬行深惡口耳之習讀易六十四卦
皆爲義說留意資治通鑑論著數百篇

念奴嬌

海天向晚漸霞收餘綺波澄新綠木落山明真箇是一

雨秋容新沐喚起姮娥摩雲撥霧駕此一輪玉桂花澄
澹廣寒誰伴幽獨 不見弄玉吹簫尊前空對此清光
堪掬露鬢風鬟何處問雲雨巫山六六珠斗闌千金沙
澄淺影轉西樓曲此情誰會敲風三歎橫玉

又

素光練影照青山隱隱修眉橫綠鳩樓高天似水碧
瓦寒生金粟千丈斜光奔雲擁霧飛過虛仝屋更無塵
翳滿軒風撼梧竹 誰念鶴髮仙翁當年曾醉賞紫霞
飛瀑對影三人聊痛飲一洗離愁千斛斗轉參橫翻然
歸去萬里騎黃鵠滿天霜曉叫雲吹斷橫玉

滿庭芳

光拂星榆輪高金掌暮烟飄盡澄空素娥幽恨霜豔洗
鉛紅醉把摩雲妙手教纖翳不點青銅知多少天高露
冷爭占九秋風 歌鐘邀勝侶園攀瓊樹簾捲珠宮算
庾樓吟賞今古應同多謝秦娥絕唱聲聲爲飄入雲中
留仙住莫教清影容易轉梧桐

醉落魄

余病足置酒圃間江梅漸開不能一舉醕對景呻吟因效山谷道人陶陶兀兀之句法其體作此以遣興云

休休莫莫當年不負西湖約一枝初見橫籬落嚼蕊聞
香長是醉落魄而今對酒空斟酌老來多病情非昨

誰人伴我臨東閣冷淡吟懷猶可追前作

鷓鴣天

臉上殘霜酒半銷晚粧勻罷却無聊金泥帳小教誰共
銀字笙寒嬾更調 人情悄悄漏迢迢瑣窗虛度可憐宵
一從恨滿丁香結幾度春深荳蔻梢

又 謝人送牡丹

甲帳春風肯見分夜陪清夢當爐熏尋香若傍闌干曉
定見堆紅越鄂君 雕玉珮鬱金裘憑誰書葉寄朝雲
蘭芽九畹雖清絕也要芳心伴小醺

木蘭花

沉吟不語晴窗畔
小字銀鈞題欲徧
雲情散亂未成篇
花骨敲斜終帶軟
重重說盡情和怨
珍重提攜常在
眼暫時得近
玉尖纖翻羨縷
金紅象管

水調歌頭

和伯稱

山雨喜開霽
爽氣滌煩襟
晚秋丹葉飄墜
籬菊散黃金
徙倚關河凝望
回首光陰輕駛
倏忽二毛侵
須信人間
世莫放酒杯深
一星子名與利
漫浮沉
塞翁禍福無
定此理古猶今
妙處祇應親到
外物從渠舒卷
出處我無心
袖手無新語
洗耳聽清音

調笑令

掩袖低迷情不禁背人低語兩知心烟蛾漸放愁邊散
細靨從教醉裏深小梅破萼嬌難似喜色著人吹不起
莫將羽扇掩明波滟灩光風生眼尾眼尾寄深意一
點蘭膏紅破蕊鈿窩淺淺雙痕媚背面銀牀斜倚燭花
先報今宵喜管定知人心裏

又飲

摘蕊和香滴得成更將白玉琢飛鯨殢嬌一任香羅沈
更折花枝作令行香泛金鱗翻蕊盞笑裏桃花紅近眼
粉壺琥珀爲君傾弄翠按紅歸來晚歸晚思何限玉
墜金偏雲鬢亂傷春誰作嬉遊伴只有飛來花片幾回

愁映眉山遠總被東風驚散

又坐

玉笙吹徧古梁州暗學芙蓉一樣愁倚窗重整金條脫
對檻不卸紅臂鞦淺淺綠靴雙鳳困柳弱花慵歛新悶
嬌多無力凭熏籠又報杏園春意盡 春盡歛新悶暗
傍銀屏撩綠髻攢眉不許旁人問簾外落紅成陣銀缸
挑盡睡未肯腸斷秦郎歸信

又博

綠檀屏下玉成圍喚擁金盆出注時多情故與諸郎戲
不惜春嬌兩髻垂珠璣滿斗猶慵起玉馬象盤還得意

漏冷銅壺喚不應更移紅燭桃花底
花底錦鋪地繡浪瓊枝光似洗
一心常在金盆裏翠袖懶遮纖指珠璣
滿斗猶慵起過盡紅樓春睡

又歌

賢川六疊小香檀玉笋纖纖不耐寒
淺破朱唇促新調紅絲短瑟未須彈
錦字兩行遮寶扇扇中鸞影迷嬌面
蘭葉歌翻春事空孤鳳雛鸞兩含怨
含怨兩顰淺羽髻雲鬟低玉燕綠沉香底
金鵝扇隱隱花枝輕顫當筵不放紅雲轉
正是玉壺春滿

八寶粧

門掩黃昏畫堂人寂暮雨乍收殘暑簾捲疎星庭戶悄
隱隱嚴城更鼓空階烟暝半開斜月朦朧銀河澄淡風
淒楚還是鳳樓人遠桃源無路 惆悵夜久星繁碧雲
望斷玉簫聲在何處念誰伴茜裘翠袖共攜手瑤臺歸
去對修竹森森院宇曲屏香煖凝沉炷問對酒當歌情
懷記得劉郎否

臨江仙

家在宋牆東畔住流鶯時送芳音竊香解佩兩沉沉都
緣些子事過却許多春 日上花梢初睡起繡衣閒縱
金鍼錯將黃暈壓檀心見人羞不語偷把淚珠勻

趙礪老

字渭師東平人娶歐陽懋女以懋待制恩補官從范成大使北還擢知臨安府坐事謫饒

州有拙庵

詞一卷

玉照新志乾道中趙礪老爲臨安尹巨瑞甘昇有別墅在西湖惠照寺西地連郡之社壇昇欲取以廣其園礪老欣然領命有州學教授入議狀謂戎祀國之大事豈可輕徇闈寺之欲易不屋之祭耶力爭之卒不能奪而止或云石斗陸九淵未知孰是

滿江紅

灑洒星郎吹綠髻勝遊霞舉秋又半月磨雲翳籟傳風
語太一青藜光對射中流蕩漾蓮舟舞戲人間今夜水
精宮前無古吾家是蓬山侶歌舞袖蘋花渚擬問津
斜漢乘槎南浦謁帝通明今得便素娥拍手心先許笑

畫闌三十六宮秋花如土

念奴嬌

中秋垂虹和韻

冰蟾駕月盪寒光不見層波浸碧幾歲中秋爭得似雲
卷秋聲寂寂多謝星郎來陪賢令快賞鰲峯極廣寒宮
近素娥不斫餘力夜久露落瓊漿神京歸路有雲翹
前跡當日仙人曾馭氣只學神交龜息今夜清尊一齊
分付穩是乘槎客天津重到霓裳何似聞笛

水調歌頭

和平湖

梅仙了無語挂笏看西山山涵秋曉水光磨蕩有無間
自是靈襟空洞更望風雲吞吐浩渺白鷗閒高誦遠遊

賦獨立桂香闌 謾長談如觀水要觀瀾物情長在人
生何用苦求難隨我一觴一詠任彼非元非白唯放酒
杯寬富貴倘來事天道管知還

晁公武

字子止鉅野人冲之子官敷文閣直學士
臨安少尹有郡齋讀書志四卷後志二卷
按岳珂程史隆興二年湯思退罷相洪适草
制作平語侍御史晁公武擊之蓋亦臺諫中
之錚錚者

京口三山志載子止游焦山詩江勢東傾劇
建餽中流巖室隱禪扁游僧誰渡降龍鉢遁
容爭慕瘞鶴銘修竹捎雲凌北固桃花吹浪
漲南溟上人勸賦斯山境乞與微吟勒翠屏

鷓鴣天

見陽春白雪或云戴平之作

笑擘黃柑酒半醒玉壺金斗夜生冰開窗盡見千山雪

雪未消時月正明
蘭燼短麝煤輕
畫樓鐘鼓已三更
倚闌誰唱清真曲
人與梅花一樣清

韓彥古

字子師延安人
新王世忠子
淳熙中知平江府
終敷文閣待制
戶部尚書

按宋釋類抄韓彥古詭譎任數李仁甫惡其爲人弗與交請謁嘗暇其亡一日知其出往見之則實未嘗出也既見延入書室有二厨貯書牙籤黃紙扁護甚嚴仁甫問此爲何書答曰先人在軍中得於北方蓋本朝野史編年成書者是時仁甫方修此編旣成詔給筆札就其家籍錄以進而卷帙浩博未見端緒彥古欲觀不可得至是仁甫聞言亟欲得見之乃曰且爲某飲酒續當以是酒罷笑謂仁甫曰此卽公所著長編也已用佳紙作副本裝治便可進御矣蓋陰戒書吏傳錄每一版酬千錢吏畏其威利其賞輒先錄送故李未能帙而韓已得全書矣仁甫雖憤媿不平而亦幸蒙其成竟用以進

浣溪沙

見陽春白雪

一縷金香永夜清
殘編未掩古琴橫
繡衾寒擁寶釵明
坐聽竹風敲石磴
旋傾花水漱春醞
落梅和雨打簾

聲

耿時舉

字德基居太學不第而卒

按吳郡志一作耿元鼎
中吳紀聞紹興中郡守王喚顯道建西樓賦
詩甚衆獨耿時舉德基爲擅揚詩曰西樓一
曲舊笙歌千古當樓面翠叢花發花殘香徑
兩月生月落洞庭波地雄鼓角秋聲壯天迥
闕干夕照多四百年來無妙手要看風物似
元和德基他文稱是居太學久之不得一第
而死惜哉

浣溪沙

見陽春白雪

露浥薔薇金井欄
轆轤聲斷碧絲乾
遼陽無信帶圍寬
花落池塘春夢靜
月生簾幙夜香寒
閒愁無力凭闌

干

又

獨鶴山前步藥苗
青山只隔過溪橋
洞宮深處白雲飄
碧井卧花人寂寂
畫廊鳴葉雨瀟瀟
漫題詩句滿芭

蕉

朱耆壽

字國箕
閩人

清波雜誌朱耆壽久遊上庠博洽能文一時
諸公皆知之累舉得官監臨安赤山酒年八
十餘而終有壽秦伯和侍郎詞云云按伯和
名墳故相檜之孫也

瑞鶴仙

壽秦伯和侍郎

櫻桃抄乳酪正雨厭肥梅風吹
吹擗威瞻格天閣見十眉環侍
爭鳴絃索茶甌試淪更涼夜沉沉
細酌問間生此日爲誰曾向玉皇
案前持橐龜鶴從他祝壽未比
當年陰功堪託天應不錯教公議
細評泊自和戎以來謀國多少蕭
曹衛霍奈胡兒自若惟守紹興舊約

張才翁

能改齋漫錄張才翁風韻不羈初仕臨邛秋
官郡守張公庠待之不厚會有白鶴之遊郡
守率屬官同往才翁不與乃語官妓楊岐曰
老子到彼必有詩詞可速寄來公庠旣到白
鶴便留題云初眠官柳未成陰馬上聊爲擁
鼻吟遠宦情懷消壯志好花時節負歸心別

離長恨人南北會合休辭酒淺深欲把春愁
閑抖擻亂山高處一登臨皎錄寄才翁才翁
增減作雨中花云云公庠再坐皎歌于側公
庠問之皎前稟曰張司理却寄來令皎歌之
以獻台座公庠遂青顧才翁尤厚

雨中花

萬縷青青初眠官柳向人猶未成陰
撥雕鞍馬上擁鼻
微吟遠宦情懷誰問空嗟壯志消沉
正是好花時節山
城留滯忍負歸心
別離長恨飄蓬無定誰念會合難
憑相聚裏休辭金盞酒淺還深
欲把春愁抖擻春愁轉
更難禁亂山高處憑闌垂袖聊寄登臨

邱

密

字宗卿江陰人隆興元年進士爲建安府推
官除國子博士出知華亭縣遷戶部郎中提

點浙東刑獄知平江府移帥紹興改兩浙轉運副使進戶部侍郎四川安撫制置使官至

同知樞密院事謚文定宋史有傳有文定公詞一卷

點絳唇

戊子之春同官皆拘文不暇遊集春暮皆興牢落之歎予亦頗歎之因作此詞三月九日也是日楊花甚盛

花落花開等閒不管流年度舊遊何處淺立空凝佇

驚拍闌干忍見春將暮憑風絮爲人飛去散作愁無數

按戊子爲孝宗乾道四年距文定登科甫及六年此詞當作於官博士時

洞仙歌

江城梅柳慣得春先處催趁風光上歌舞見九衢車馬
流水如龍喧笑語羅綺香塵載路歡娛多暇日樽俎

風流重見承平舊。官府有多少佳麗事。墮珥遺簪芳徑裏。瑟瑟珠璣翠羽。好惜取韶華。醉連宵更莫待收燈酒。闌人去。

又 賦金林檎

豐肌膩體淡雅仍矜貴。不與羣芳競。姝麗向瓊林珠殿。獨占春風。仙仗裏曾奉三宮燕喜。低徊如有恨。失意含羞。樂事繁華竟誰記。應憐我。今老去無句酬伊吟未就。不覺東風又起。鎮獨自黃昏怯。輕寒這情緒。年年共花憔悴。

沁園春

景明告行頗動懷歸之念。偶得帥鄉詞因次其韻。前闕奉送後闕以自見云。

雨趁輕寒風作秋聲燕歸雁來動天涯羈思登山臨水
驚心節物極目烟埃客裡逢君纔同一笑何遽言歸如
此哉別離久算不應興盡却棹船迴 主人下榻高齋
更檢點笙歌頻宴開便流連不到迎春見柳也須小駐
度臘觀梅樓上盈盈閨中脉脉應念胡麻好種教從教
去正危樓望斷小倚徘徊

撲蝴蝶

蜀中作

鳴鳩乳燕春在梨花院重門鎮掩沈沈簾不捲紗窗紅
日三竿睡鴨餘香一綫佳眠悄無人喚 謾消遣行雲
無定楚雨難憑夢魂斷清明漸近天涯人正遠儘教閒

了秋千巖著海棠開徧難禁舊愁新怨

夜行船

越上作

水滿平湖香滿路繞重城藕花無數小艇紅妝疎簾青
蓋烟柳畫船斜渡恣樂追涼忘日暮簫鼓月明人去
猶有清歌迢遞聲在芰荷深處

西江月

明日又還重九黃昏小雨疎風菊英萸糝一尊同付與
今宵好夢寒意梧桐葉上客愁畫角聲中小樓何日
却從容千里此情應共

錦帳春

己未孟冬樂淨見梅英作

翠竹如屏淺山如畫小池面危橋一跨著樓亭臨水宛
然郊野竹籬茅舍好是天寒倍添妍雅正雪意垂垂
欲下更朦朧月影弄晴初夜梅花動也

張良臣

字武子號雪窗大梁人避地來鄞因家焉隆
興元年試南省魏文節公祀時爲參詳官擢
其三策見知舉張燾曰此文拙古必故人張
武子所爲及撤棘果良臣也官止監左藏庫

有集

十卷

樓鑰攻媿集張武子詩有客向愁中都老盡
祇留平楚伴消疑又詞有昨日萱花籬下過
忽然迎面好風吹獨自立多時其大約可見
矣

西江月

見絕妙好詞

四壁空圍恨玉十香淺捻啼綃般雲度雨井桐凋雁雁

無書又到 別後釵分燕尾病餘鏡減鸞腰蠻江荳蔻
影連梢不到參橫易曉

采桑子

佳人滿勸金蕉葉夜玉春溫別後黃昏燕子樓高月一
痕 年年依舊梨花雨粉淚空存流水孤村不著寒鴉
也斷魂

許及之

字深甫永嘉人隆興元年進士寧宗朝歷官
參知政事知樞密院事宋史有傳有涉齋集

卷十八

按宋史及之諂事侂冑無所不至侂冑生日
朝行上壽畢集及之後至闈人掩關拒之俯
僂而入爲尙書二年不遷見侂冑流涕叙其
知遇之意及衰遲之狀不覺屈鄰侂冑惻然

憐之亡何同知樞密院事當時有由竇尚書
屈邪執政之語其行事狠鄙不足齒數恐飾
糟毀醜未可遽嘲漁父也

賀新郎

按此係五日詞題已脫落
雪外集

見陽春白

舊俗傳荆楚正江城梅炎藻夏做成重午門艾釵符關
何事付與癡兒騃女耳不聽湖邊鼙鼓猶炷香薰衣
潤對瀟瀟翠竹都忘暑時展卷誦騷語新愁不障西
山雨問樓頭登臨倦客有誰懷古回首獨醒人何在空
把清尊酌與漾不到瀟湘江渚我又相將湖南去已安
排弔屈嘲漁父君有語但分付

徐似道

字淵子號竹隱黃巖人乾道二年進士歷官
權直學士院遷秘書少監終提點江西刑獄

有竹

隱集

鶴林玉露徐淵子詩俸餘擬辦買山錢却買
端州古硯磚依舊被渠驅使在買山之事竟
何年徐除直院劉改之賀啟云以載鶴之船
載書入觀之清標如此以買山之錢買硯平
生之雅好可知又云淵子詞清雅余尤愛其
夜泊廬山云云
按劉仙倫招山小集送徐淵子知縣云君作
西昌宰人如太史賢戴石屏集有陪徐淵子
使君登白雪樓云借問風流賢太守孟亭添
得野夫無是淵子久居外任後乃內擢秘監
耳

瑞鶴仙令

見陽春白雪

西子湖邊春正好輪他公子王孫落花香趁馬蹄溫暖
烟桃葉渡晴日柳枝門 中有能詩狂處士閒將一鶴

隨軒百錢買隻下湖船就他弦管裏醉過杏花天

浪淘沙 夜泊廬山

風緊浪花生蛟吼鼉鳴家人睡着怕人驚只有一翁捫
虱坐依約三更雪又打殘燈欲暗還明有誰知我此
時情獨對梅花傾一盞又一詩成

王

炎

字晦叔婺源人乾道五年進士調崇陽主簿
張杖帥江陵聞其賢檄入幕府秩滿授潭州
教授改知臨湘縣積官至軍器監中奉大夫
賜金紫封婺源縣男居武水之陽雙溪合流
因以自號有雙溪

集二十七卷詞附

按朱子集中有和晦叔寄弟詩云祇今心事
同千里靜對簾瓢一啜然晦叔亦多與朱子
往還之作所著讀易筆記尙書小傳禮記論
語孝經老子解春秋衍義象數稽疑禹貢辯

考工記鄉飲酒儀諸經考疑編年通紀紀年
提要天對解韓柳辨證傷寒論諸書惜已不
傳

浪淘沙 菊

秋色滿東籬露滴風吹憑誰折取泛芳卮長是年年重
九日苦恨開遲 因記得當時共撚纖枝而今寂寞鳳
孤飛不似舊時心緒好惟有花知

臨江仙

鶗鴂一聲春事了不知苦勸誰歸花梢香露染薔薇小
梅酸著齒酒榼正堪攜 鴨綠一篙新雨過遠山半出
修眉仙翁理棹欲來時遶簷烏鵲喜報與主人知

青玉案

深紅數點吹花絮。又燕子飛來語遠。水平蕪春欲暮。年年長是清明時候。故遣人憔悴。竹鷄啼罷山村雨。正
寥落無情緒。猛省從前多少事。綠楊堤上樓臺如畫。此
境今何處。

水調歌頭

江月冷如水。江水碧於空。晚來一霎雨。過爲我洗秋容。
悄悄四山人靜。凜凜三更露下。天濶叫孤鴻。喚醒蓬窗
夢。身在水晶宮。揖湘妃。招月姊。御清風。素琴韻遠不
覺醉。眼杏花紅。禹穴騎鯨仙去。東海釣鰲人遠。此意與

誰同倚柁一長嘯幽壑舞魚龍

木蘭花慢

細桃花樹下記羅鞞昔經行至今日重來人惟獨自花
亦凋零青鳥杳無消息徧人間何處覓雲鞞紅錦織殘
舊事玉簫吹斷餘聲銷疑衣故幾時更又誰復卿卿
奈鏡裏琴中離鸞有恨別鵠無情齊眉處同笑語但有
時夢見似平生愁對嬋娟三五素光暫缺還盈

張履信

字思順號游初鄱陽人侍郎南仲
之子嘗監江口鎮官至連江守

咸淳臨安志載履信飛來峯詩云飛來何處
峯木杪夜千尺愁猿喚不磨月色同一白又
冷泉亭云水石一闌干僧歸四山靜攜琴譜
澗泉月浸夜深冷

詞綜補遺卷六
柳梢青

見絕妙好詞

雨歇桃繁風微柳靜日淡湖灣寒食清明雖然過了未
覺春閒行雲掩映春山真水墨山陰道間燕語侵愁
花飛撩恨人在江南

詞金門

春睡起小閣明牕兒底簾外雨聲花積水薄寒猶在裏
欲起還慵未起好是孤眠滋味一曲廣陵應忘記起
來調綠綺

詞綜補遺卷六